



N°5873
Reçue le 04.03.2022
Déclarée recevable
Président de la Chambre des Députés
(s.) Fernand Etgen
Luxembourg, 04.03.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 04/03/2022

Här President,

Sou wéi den Artikel 80 vun eisem Chambersreglement et virgesäit, bieden ech Iech, dës parlamentaresch Fro un d'Ministère fir Interieur & Ëmwelt, Klima an nohaltëg Entwécklung weiderzeleeden.

An der parlamentarescher Fro n°3666 vum leschte Joer goung Rieds vun engem Trainingsdépôt zu Waasserbëlleg, dee vum CGDIS benotzt gëtt, fir verschidde Coursë fir Pompjeeën ofzehalen. Dës Cours'en goufe fréier vun der RAGTAL Asbl organiséiert an zënter der Reform vum Rettungswiesen am Joer 2018 huet de CGDIS d'Coursen iwwerholl an d'Formatioun dem Institut National de Formation des Secours (INFS) ënnergliddert.

De Standuert vum Trainingsdépôt selwer befënnt sech an enger Natura2000-Zon an ënnerleit deemno méi strengen Ëmweltoplagen, wat et méi schwéier mécht, fir de Site weider auszubauen an ze notzen. Wéi d'Inneministeschen an hirer Äntwert geschriwwen huet, hat och d'EU-Kommissioun sech schonn ageschalt, fir eng weider Degradatioun vum Natura2000-Habitat ze verhënneren. Deem zu Trotz hält de CGDIS weider drop fest, dass d'Übungsaktivitéite weider op dësem Site solle stattfannen an hofft, dass de Site an Zukunft eng Naturschutzautorisation erhält.

Et stellen sech verschidde Problemer um Site : esou feelt et zum Beispill un Duschen, wou d'Participanten an d'Instrukteren sech no de Brandübunge kënnen propper maachen. Et existéieren zwar Lavaboen um Site, mee dës bezéien d'Waasser aus engem Reewaassertank an engem Sammelbecken an d'Waasserqualitéit ass deemno bedenklech. Och d'Toilettë funktionéieren am Wanter net, wann dobausse Minustemperature sinn. Grad fir d'Instrukteren, déi d'Übungen e puer Mol d'Woch müssen organiséieren ass dës Situatioun desagreabel an och gesondheetlech bedenklech, well si bei Realbrandcourse permanent a Kontakt mat Brandruuss sinn, deen iwwert d'Haut kriibserreegend ass. Fir dës Risiko ze minimiséieren, missten d'Leit sech dofir no de Cours'en kënnen wäschen.

Et stellt een sech d'Fro, ob de CGDIS als Patron an der Flicht steet, fir d'Hygiëneskonditiounen op deem Site verbessern.

An deem Zesammenhang wéilt ech de Ministeren dës Froe stellen:

1. Ee Joer ass zënter der leschter Äntwert vun der Ministesch vergaangen: wéi ass de



www.piraten.lu

Stand vun dësem Dossier haut: ass mat enger Naturschutzautorisation fir de Site ze rechnen?

Wäert de Site ëmklasséiert ginn? Falls jo, wéini?

Hält de CGDIS weider dorunner fest, dass den Trainingsdépôt um Natura2000-Site bäibehale gëtt?

2. Huet de CGDIS ee Plang B, falls de Site zu Waasserbëlleg keng Geneemegung sollt kréien? Falls jo, wéi eng Sitten géife fir een Trainingsdépôt a Fro kommen a wéi schnell kéinten dës prett gemaach ginn?
3. Firwat existéieren an engem Trainingsdépôt, dee reegelméisseg genotzt gëtt, keng Dusche mat propperem Waasser fir d'Instrukteren an d'Participanten? Falls keng Waasserleitung op dësem Site ass: firwat gëtt net einfach eng mobil Dusch mat engem Waassertank an engem Sammelbecken opgestallt?
4. Generell stellt sech d'Fro, ob den aktuelle Standuert mat sengen Infrastrukturen am Wanter fir Formatioune gëeegent ass.
 1. Kann d'Ministesch bestätegen oder ausschléissen, dass d'Participanten bei dëse Formatioune sech am Wanter bei kalen Temperature bis op d'Ënnerwäsch ënnert engem Zelt mussen ausdoen, bevir se an d'Vestiairen era kënnen?
 2. Kann d'Ministesch bestätegen oder ausschléissen, dass am Wanter keng Méiglechkeet besteet, fir naass Aarbechtskleedung ze drëschnen an deemno d'Participanten an hirer naasser Tenue mussen weiderschaffen?
 3. Ass um Site waarmt Waasser, fir dass d'Participanten an d'Instrukteren sech kënnen wäschen?
5. De groussherzogleche Reglement vum 3te November 1995 concernant les directives en matière de sécurité dans la fonction publique gesäit präzis Prozedure vir, fir d'Leit viru kriebserreegende Stoffer ze schützen. Bei de Realbrandkursen, zum Beispill, kommen d'Participanten iwwert d'Otemweeër an d'Haut mat esou kriebserreegende Stoffer a Kontakt. D'Prozedur gesäit esou och vir, dass kontaminéiert Kleeder a Materialien a speziell virgesinne Beräicher deposéiert mussen ginn. Am CGDIS gëtt et dofir een Hygienskzept mat gielen, rouden, bloen a wäissen Zonen.
 - Gëtt dëst Hygienskzept, wéi et am groussherzogleche Reglement festgehalten ass, um Site zu Waasserbëlleg zu 100% ëmgesat?
6. Ugesiichts vun de verschiddene Mängel, déi um Site existéieren, wéi kann de CGDIS versécheren, dass d'Aarbecht vun den Instrukteren, déi reegelméisseg d'Übungen um Site mussen leeden, gesondheetlech onbedenklech fir si ass?
7. Ass de Site, ugesiichts vun all sengen Nodeeler an dem Fakt, dass een sech an enger Gréngzon befënnt, der Ministesch no nach gëeegent fir permanent Realbrandausbildungen ze halen? Falls jo, wéi eng Grënn schwätze fir de Site?
8. Wéi eng Institutioune an Organisatioune sinn zoustänneg fir d'Aarbechts- an d'Hygienesbedingungen um Site Waasserbëlleg ze kontrolléieren?

Mat déiwem Respekt,





GOERGEN Marc

Député



www.piraten.lu